

四庫全書

集部

欽定四庫全書

粵西詩載卷二十一

桂林府通判汪森編

五言絕句

送譚八之桂林

唐  
王昌齡

客心仍在楚江館  
復臨湘別意猿鳥外  
天寒桂水長

峨山

柳宗元

荒山秋日午  
獨上意悠悠  
如何望鄉處  
西北是融州

桂州北望秦驛手開竹徑至釣磯留待徐容州

幽徑為誰開美人城北來王程儻餘暇一上子陵臺

鬼門關

李德裕

一去一萬里千知千不還崖州在何處生度鬼門關

題寶積山

元晦

石靜如開鏡山高若聳蓮筍抽玉管花蔓綴金鈿

桂州經佳人故居

李羣玉

桂水依舊綠佳人今不還祇應隨暮雨飛入九疑山

霞通海天曙月來東山白共是凭欄人誰足當秋色

七星山

張孝祥

朝遊七星巖暮上千山觀東西兩奇絕勢略嶺海半

揭帝塘

山月半池白水風終夜涼蛙聲作鼓吹荷芰製衣裳

北牖洞

呂愿中

南窻聊寄傲北牖有涼風巖洞幽深處結茅容老翁

濯纓亭

折彥質

澄練正紫檻高屏近擁門偏宜雲慘淡更好月黃昏

平南濯纓亭

張栻

芙蓉豈不好濯濯清漣漪采之不盈把惆悵暮忘饑

七里店口占

范成大

分手暮江寒徘徊立馬看尋常相見易倍覺別離難

題靜江

陳藻

桂林多洞府疑是館羣仙四野皆平地千峰直上天

題西山

李曾伯

看我登峰頂誰將荆棘披路從林外入洞向水中竒

鵲一首

劉克莊

久不聞烏鵲朝來噪不休殊鄉無喜事應為買歸舟

白石山

葉原賀

雲梯連石磴香樹鎖松關林壑疑無路神仙別有山

潯州寒亭

姚嗣宗

井邑倦炎酷西巖境獨清人皆有涼意亭遂得寒名

桂水五千里二首

元  
楊維禎

桂水五千里瀟湘雨氣空衡山七十二望見女英峰  
桂水五千里南風大府開象王新貢入鮫女送珠來

流杯橋

余觀

曲水分山陰輿梁勝溱洧一脉見高風駟馬安足取

注玉泉

雲蒸崑山液月浸藍田英臨風嚙沆瀣滿腹珠璣鳴

桂山泉

寒蟾窺玉甃老兔遺香酥化為銀河水一沃炎海枯

藤江

明  
富禮

泊舟滄江濱天氣喜高曠  
化劍已成龍桃李湧春漲  
北流舟上懷故人

黃福

昨酬東岸酒今泛北流船  
回首瀘江遠令人思惘然

過蒼梧

一棹抵蒼梧西山日欲晡  
魚羹催僕啜蛇酒入城沽

送人回廣西

海口春光早沙頭柳色新  
滿斟交趾酒遠送桂林人



南山秋色

孔鏞

悠然見南山遠含秋色爽誰撥白雲開芙蓉清萬丈

勾漏丹砂

葛洪仙已去誰更識丹砂洞門春寂寂開遍碧桃花

雲凌斑竹

雲凌竹點痕豈是玉環淚君不見瀟湘斑斑同一類

濯纓石

晚上濯纓亭泉石供吟眺不聞孺子歌日落魚收釣

採桑化石

桑女徒自傷化作青青石雲鬟懶不梳長向江邊立

書臺朗誦

漁郎閱讀書聲落烟波裏日出不見人芳名遺古史

負薪登仙

二子樵都嶠一嘯聞碧落不意半落梅乃是萬年藥

鐘鬪龍潭

一勺水之多鐘龍何角力我來覓仙踪潭空漾清碧

仙李洞

洞門棲彩霞晚晴朝作雨我欲飽餐之長生能有幾

游湘山寺小詩書遺寺僧覺靜 蔣冕

孤塔望中青鐘聲隔烟樹朝暮見雲飛不見雲歸處

寺有

菴名  
雲歸

何處來笙竽風自松林過老禪寂無聞日午猶高卧  
山色自古今鳥聲時上下我來豁塵襟恍疑在圖畫  
杖藜叩禪扉來坐松下石囂寂已兩忘何苦分心迹

自白石先壘掃松遊龍隱巖書五小詩刻石上

羅水繞巖前西來却東去從古至今晝夜流不住

謝却軟紅塵踏此烟霞路山靈莫笑人我已來兩度

年年拜先壘路出石燕岡不知咫尺地幽境此中藏

石燕

岡去嵩僅  
數十步

幽勝在路傍往來懵不識牧叟與樵夫眠坐如衽席  
樵牧日在山可識山中趣欲覓塵外蹤往哉隨杖履

送張吉遷梧州守二首

陳獻章

甲兵滿一船江門來訪別贈君欲何言笑把梅花折  
少年恣行遊老病徒拘綴送君今夜心還到蒼梧別

送李子長往梧州謁張太守二首

春棹去江門汭流焉汲汲點筆烟外山歸來看懷集  
不聞端別駕敬士如子長問道蒼梧下登歌刺史堂

全州引路松三首

魯鐸

萬松官道傍莫知所從始吁嗟松上鶴閱人亦多矣  
我欲撫長松前驅忽相警自笑乘槎遊亦解殺風景

終日聽松風彷彿連天浪却疑奉使身真坐浮槎上  
又以偶來松樹下為韻五首

平生愛松風耳中不常有于今終日聽清緣諒非偶  
我欲哦松下官程苦見催幸聞歸去路還向此中來  
常常多異夢矯矯見羣龍歲晚誰原破全州引路松  
國初章太守手澤尚如故道傍十萬松箇箇甘棠樹  
我有讀書臺宜冬不宜夏縮地如可傳安此虬枝下

臨桂道中漁者

危灘若奔雷江魚正貪上順水飛漁船斜下攔江網

千秋峽阻風

無風還覺風有風安可過况當大風時自分終日坐

府江舟中四首

急雨翻盆下危灘倒海來篙師須戮力虎穴正堪猜  
花底瓊泉落雲中碧樹交祇疑仙所宅誰遣賊為巢  
灘從雷劈過膽落骨還驚浪打船窓上真成動地聲  
野堡明弓刀風船激笳鼓畏塗不成眠更聽江邊雨

永淳縣

孤城倚江山居然擅清爽瘴鄉眼初明肩輿雨中上

姝子山

千秋峽口山宛然露雙乳却怪山中雲白衣在何許

廣西風土四首

徐問

北風施頑陰風急便成雨月無三日晴蝸牛上臺廡  
山石不出雲巖空樹根貼未知秋去時春風下黃葉  
青草瘴連天夸獠窺斷口盡日不逢人孤軍避還守



山上結茅廬山下舊溝洫農人不在田猛人且耕植

全州道中

嚴嵩

梅花千樹雪松葉萬溪雲湘源行日日賴爾灑塵氛

蒼梧即事

徐棻

山色連蒼漢江流繞郡城往來橫渡口強半廣州聲  
出郭無車馬扶橈有女郎已看浮桂水猶指渡潯陽  
經行七百里憑眺萬千山不信他鄉遠纔過雙樹間  
當杯酣寄酒汲井漱水泉咫尺違勾漏空令懷稚川

旌旗沿岸出，蕙苒逐車來。矍鑠銅船將，營荒半草萊。  
誅茅臨水曲，編竹住溪流。歌舞春城暮，烟花自一州。  
舟車頭會少，泉貨尾銜歸。關吏無多事，看山到落暉。  
一水狂奔馬，三江不辨牛。寒濤六七月，半沒繫龍洲。  
殘棟烟猶紫，頽垣燼尚封。相逢悲爛額，愁對祝融峰。  
扼險開雄鎮，當關借重臣。幾番貔虎士，更戍往還頻。  
亂竹斑凝砌，疎梧翠滿庭。月明湘水上，誰起帝妃靈。  
地僻烏啼樹，庭空吏放衙。西河言偃室，惟種碧桃花。

興安陡江口號

顧璘

江壁山頭出舟騎石背行問君緣箇事辛苦作南征

湘山雜詩

古塔境

古塔已千載白骨為黃金寒燈耿不滅照見西來心

雲歸菴

松林有茅宇白雲還往來山僧愛雲好柴門夜長開

飛來石

誰騎蒼鸞來啄破苔花碧經年不歸去化作山頭石

甲亭

不信湘中好江山天下稀如何萬里客終歲澹忘歸

卓錫泉

老禪卓錫處石上泉猶清紅塵不相染唯有蒼苔生

玉虹泉

一條寒泉色迤邐穿石下秋雨何處晴猶餘白虹挂

法華泉

寂寂空山深荒泉四時冷惟餘月明夜山猿弄孤影

玄通洞

下窺杳無極仰視白日微山人把火入照見石燕飛

獅巖

綠草斷行迹鉤然石門開分明洞天裏不遇仙人回

露勝亭

高亭行處盡遠岫望中微日月開禪觀雲霞護客衣

歸自灌陽望湘山口占

十日別湘山見如故人面何況石頭城是儂舊鄉縣

寄顧全州

陳沂

曲浦湘雲暮幽篁楚雨秋愁心寄鴻雁煩爾過衡州

凌山驛次湛內翰四首

潘希曾

陰雨忽開霽江雲散曉霞日升林影動一徑見山家  
喜樹晴光艷澄江春水深漁翁坐曬網顧婦作蠻音  
風日春來好江村鵲衆芳簷暄嬉婦子隴夕下牛羊  
南裔行將盡荒村僅自存蕭條村裏驛日午不開門

興安道中見杜鵑花有感

袁 袞

杜鵑啼已老杜鵑花尚開昔從此山去今見此花回

登月華洞寄藩臬諸公

晨登月華洞洞口雲微微桂嶺香何處孤心雲共飛

平樂舟中

方弘靜

羽扇難揮暑素衣行欲縉如何桂嶺表日挂雲帆為

大龍潭

張 翀

山下清泉出人間白髮來閑雲如可卧何必問蓬萊

隱山有六洞每洞名皆唐人隸書所題徧造其下為  
賦五字絕句六首

張鳴鳳

朝陽

六洞盡玲瓏栖真定在東晨光將紫氣還遶白陽翁

白雀

瑞羽去已久深巖名不滅遙思千載人風素何高潔

嘉蓮

巖潭迴合處可望不可入欲摘同心花傍崖長佇立



夕陽

烟際度歸樵明滅不可辨返照射西巖潭光映東巘

南華

昔人此采蓮今日此栽稻躊躇桑海間笑問南華老

北牖

巖窓偏駐日石榻但眠雲聖世辭家隱何慚巢許羣

同張羽王晚酌灘山盤石上

俞安期

小飲坐磐石石氣夕復昏漁燈照江水見我石上樽

劉仙巖十詠為張質卿賦

并序

劉仙巖仙人劉仲遠所居抵山之半入戶旋返而上  
登者為升真洞仲遠鍊真沖舉咸在茲焉左下有坪  
質卿因故址構閣曰通明為上帝行在又左考室曰  
栩栩半嵌巖中中設几榻以供燕寢又左由別道上  
曰穿雲巖又左為仙迹巖足迹宛然趾輪可辨傳謂  
仲遠所示出巖稍左有石方平徑五笏餘可設弈具  
曰弈石下臨絕壑斷石闌之又上而左有石高出下

削上寬曰凌風臺又左行爲道數十百趾三峰特上  
峙如鼎足中有土坪構閣曰山鼎北有一闕下矚南  
谿延眺城郭比出羣山蓼戟並列復折而右履巘岼  
門數十百趾有石突出亭冠其顛曰縣居復右行數  
十百趾左右折而上最高得石坪類若九成入二十  
餘笏橫亘數十笏背負絕巘下臨升真南出諸峰舉  
伏趾下度可構樓十二楹質卿欣然將有事焉豫名  
曰中天樓異日待安期羨門之屬同為遊處之所命

余各賦短篇紀之總得十首

升真洞

石關磬折登仙客鍊形處北戶吐烟飈時為上征馭

通明閣

丹閣擬絳宸隆穹挂巖際羽衛蔽山來月中下羣帝

栩栩室

丈石巖之阿高眠我忘汝仙仙夢裏身微風自飛舉

穿雲巖

巖行穿白雲巖卧藉白雲到來巖下客即是雲巾君

仙迹巖

劉仙住巖下足迹留石間諒非斧斤力不類潘吾山

弈石

石面五笏平恰稱圍碁坐誤教傍立人樵柯爛幾箇

凌風臺

凌競百尺臺近瞰仙靈宅恒慮逐風移人指飛來石

山鼎閣

三峰列作叢孤閣出其裏奚待燭名香烟華日浮紫

縣居

翹然石上居宛爾空中現高接絳霄叢下捧蒼雲片

中天樓

天半綴飛樓應如化宮化每候好居人龍鸞息驂駕

桂林巖洞雜詠

昔人謂桂林山水甲天下非以巖洞勝乎歲甲午余  
度嶺日與桂人士遊宴江山其峭壁削成銳峰攢列

固云奇矣然有山俱石有石俱空一山之間至函數  
洞或闢山巔或次水際或突竅幽迴或高敞朗徹瑤  
漿葩石豎立倒懸罔不駭目悚神恍惚若幻凡此數  
十計咸又彙列郭以內外不數里間蓋挂若巖洞之  
數信宇內不復更有也竊以遊宴有詠僅舉其概而  
巖洞詭異豈遑備陳乃取諸洞夙被名稱者各作小  
引綴以短章至有被名稱而足迹未至足迹既至而  
蔑有名稱與夫被名稱而非嫻雅及別有專詠者咸

不及已

水月洞

灘山東北如石梁跨江門出水上陽江合灘水南去

分貫洞中

洞戶引江流南下清瀾瀾月過影孤沉潛蚪抱珠起

雉巖

雉山欲翔巖啟北麓石門屈曲入復數丈出登高臺

灘水當臆



雉舉山形高蛇蟠巖徑曲臨臺見春江百折巖扃綠

玄風洞

洞腹深廣如橐籥然積氣噫風時出其戶當之震悚

豎髮栗肌

深竇貫陰崖寒飈生不絕縣泉石罅垂炎月吹成雪

冷水巖

石門低壓碧澗中橫直渡飛梁壁竇更下過此虛曠

北達棲霞

屏風巖

兩壁瑩潔如琉璃屏鍾乳森然神雕鬼琢

空巖多寒風壁列如屏曲苔石紛倒垂琉璃掩蒼玉

玩珠巖

巖嵌洑波高垂石柱室有石紋宛然二龍圓暈如珠

適直所嚮

石柱支巖門珠暈嵌巖室競攬兩蛟龍疑向迴波出

韶音洞

舜山之麓石穴虛明北牖爰臨清江來繞水石發響  
日奏簫韶

石牖次江潭琤琤發靈異水樂諧古音率舞魚龍至

華景洞

高扉廣廈椽柱交加文綠塗金絢爛驚目

石扇劃烟堂四壁塗青翠葩乳擁華椽翻成佳麗地

玄巖

石關北嚮陽曜寡臨玄井玉池昏莫可測

舍舟南谿南穿巖北山北白石夜微明玄井晝深黑

白龍洞

上高下廣石室邃深凝乳延貫其上若蛻龍骨

曲折叩清寒風雨藏靈窟白石結瑤漿具如龍首骨

隱山六洞詩有序

在昔諸洞得水增觀西湖既陸洞壑亦枯往侈名稱  
未厭余意既讀韋吳二記想其湖池臺榭之盛蓋不  
勝陵遷谷變之慨焉

朝陽洞

雲竇玲瓏開石漿涓滴灑晚來含日華垂垂雨猶下

南華洞

石室山之陽靈泉湛湛挹寒氣動颯然時有薰風入

夕陽洞

石窟呀然深風出濯烟霧西林返照來涼陰納疎樹

北牖洞

亂石騁瑰姿陰霞結深翳涼風留醉眠自獎羲皇世

白雀洞

昔人獻神雀洞名適見取臨臨仙鼠飛猶疑下霜羽

嘉蓮洞

靈洞被嘉稱神膏效其詭倒綴紫芙蓉同心復駢蕊

舟行自桂林至昭州雜述六首

日出江霧低蒼涼汎江水岸人趁墟灘灘漁入市  
深潭夾峻壁白日青湍多波心浮沫動下識遊犀過  
拔地復刺天千山若羽筵何山非石峰何峰無巖竇

大山如鵬騫小山如鷺舞孤峰斜奮頭連峰曲張羽  
怪姿更萬端異形盡羣變紛紛最好山多隸陽朔縣  
三百六十灘懸沫飛如撒晚計晨發初已過一百八

羅叢巖

陳中

轟轟山光映團團樹影重斷猿啼午夜孤鶴唳秋風

潯江

劉長吾

秋風黃葉樹夜月白蘋花古渡經行少平郊入望賒

永井寺

蘇濬

雲色倚層層斜陽對老僧相看無限意惟有玉壺冰

銅鼓

莫辨雌雄色猶聞風雨聲年年春草綠何處伏波營

六言

寧浦書六首

宋秦觀

揮汗讀書不已人皆怪我何求我豈更求榮達日長聊以消憂

魚稻有如淮右溪山宛類江南自是遷臣多病非干此



地烟嵐

南土四時盡熱愁人日夜俱長安得此身作石一齊忘  
了家鄉

洛邑太師庵謝龍川僕射云亡他日歸然獨在不知誰  
似靈光

身與杖藜為二對月和景成三骨肉未知消息人生到  
此何堪

寒暑更拚三十同歸滅盡無疑縱復玉關生入何殊死

葬邊陲

龍隱巖

方信孺

曾榜武夸九曲何如挂嶺七星水石小容螭開烟雲長  
帶龍腥

次韻景雲蒼梧往復雜詩六首

明陳獻章

崖收矮日寂淡江帶翠烟輕浮來往扁舟閒轉悅城古  
木槎頭

白日村前布狗黃茅山裏鉤輶詩人吟偏適意估客歌

為消愁

朝辭白土低岸晚泊和尚高岡樵唱雲邊細路漁家石  
角輕航

雲木幽疑絕境江流東見通津蒼梧遠尋仙侶端溪頗  
恨情人

天地安排蓂莢筮江湖放浪漁船或者天隨是我斜風細  
雨前川

學得脫胎換骨何須東走西奔宇宙滯形骸內未免戀

繼兒孫

拜柳山先壠後坐率性堂志感

蔣冕

五十年前此地先君攜我登臨今日重來感慟繞墳松  
檜成林

昔我先君葬日四山風雨淒迷徹夜燐光遍地不分遠

近高低


我先君葬柳山寸月亭右葬之夕大風雨不止  
自山麓至城北門外遍地皆燐其光煜煜然青

也不知何異冕官春坊時嘗因郊齋宿東朝房偶與館  
長圭峰羅公談及圭峰謂其邑栢崖大宗伯先世葬其

曾祖亦有此  
異蓋吉徵也

灘江口田家

查卧横侵汲道崖傾半沒楓潭落日射魚磯上閒時種  
豆山南



粵西詩載卷二十一

欽定四庫全書

集部

粵西詩載卷二十二

詳校官庶吉士

臣瑚圖禮

主事銜臣徐以坤覆勘

總校官庶吉士

臣朱

鈐

校對官庶吉士

臣

吳裕德

謄錄監生

臣徐

彰

欽定四庫全書

粵西詩載卷二十二

桂林府通判汪森編

七言絕句

登逍遙樓

唐宋之問

逍遙樓上望鄉關  
綠水泓澄雲霧間  
北去衡陽二千里  
無因雁足繫書還

柳州暑中作

柳宗元

南州溽暑醉如酒憑几獨眠開北牖日午睡覺無餘聲  
山童隔竹敲茶臼

酬浩初上人欲登仙人山見貽

珠樹玲瓏隔翠微病來方外事多違仙山不屬分符客  
一任凌空錫杖飛

雨中贈仙人山賈山人

寒江夜雨聲潺潺曉雲遮盡仙人山遙知玄豹在深處  
下笑羈絆泥塗間



柳州二月榕葉落盡偶題

宦情羈思共悽悽  
春半如秋意轉迷  
山城過雨百花盡  
榕葉滿庭鶯亂啼

柳州寄京中親故

林邑山連瘴海秋  
牂牁水向郡前流  
勞君遠問龍城地  
正北三千到錦州

曹侍御過象縣見寄

破額山前碧玉流  
騷人遙駐木蘭舟  
春風無限瀟湘意

欲採蘋花不自由

湘中酬張十一功曹

韓愈

休垂絕徼千行淚  
共泛清湘一葉舟  
今日嶺猿無越鳥  
可憐同聽不知愁

蠻中

張籍

銅柱南邊毒草春  
行人幾日到金麟  
玉環穿耳誰家女  
自抱琵琶迎海神

瘴水蠻江入洞流  
人家多住竹棚頭  
青山海上無城郭

惟見松排出象州

送梧州王使君

楚江亭上秋風起  
看發蒼梧太守船  
千里同行從此別  
相逢又隔幾多年

桂江中題香頂臺

劉言史

峒峒香積凌空翠  
天上名花落幽地  
老僧相對竟無言  
山鳥却呼諸佛字

桂江逢王使君旅櫬歸

故人丹旆出南威  
少婦隨喪哭漸歸  
遙想北源新隴上  
日光寒淺水松稀

獨秀山

張固

孤峯不與衆山儔  
直入青雲勢未休  
會得乾坤融結意  
擎天一柱在南州

桂州口號

戎昱

畫角三聲動客愁  
曉霜如雪覆江樓  
誰道桂林風景暖  
到來重著早貂裘

留別南溪

李渤

長歎春泉去不回我今此去更難來  
欲知別後留情處手種巖花次第開

如雲不厭蒼梧遠似鴈逢春又北歸  
惟有隱山溪上月年年相望兩依依

宿灌陽縣

戴叔倫

十月江邊蘆葉飛灌陽灘冷上舟遲  
今朝未遇高風便還與沙鷗宿水湄

寄桂帥

劉宗龜

碧幢仁施合洪鈞  
桂林前倍得春  
莫戀此時好風景  
礮溪不是釣魚人

寄陽朔友人

曹鄴

桂林雖產千株桂  
未解當天影日開  
我到月中收得種  
為君移向故園栽

老圃堂

邵平瓜地接吾廬  
穀雨乾時手自鋤  
昨日春風欺不在

就牀吹落讀殘書

西郎山

西郎何事面西方欲會東郎隔大江自古明良時一遇

東郎未會恨斜陽

東郎山

東郎屹立向東方翹首朝朝候太陽一片丹心存萬古  
誰云坐處是遐荒

廣福巖

天地以來自融結方廣高深無丈尺書言不盡畫難成  
留與人間作奇特

東洲

江城隔水是東洲  
渾是金鰲水上浮  
萬頃頽波分瀉去  
一洲千古砥中流

寄桂府楊中丞

趙嘏

遙聞桂水遶城隅  
城上江山滿畫圖  
為問訾家洲上月  
清秋擬許醉狂無



訾洲宴遊

楊漢公

桂林雲物畫漫漫  
雨裏花開雨裏殘  
惟有今朝好風景  
櫻桃含笑柳眉攢

訾家洲

歐陽賓

舊業分明桂水頭  
人歸業盡水空流  
春風日暮江頭立  
不見漁人有釣舟

陶潛彭澤五株柳  
潘岳河陽一縣花  
兩處爭如陽朔好  
碧蓮峯裏住人家

題華嚴洞石壁

無名氏

巖前流水無人渡  
洞口碧桃花自開  
東望蓬萊三萬里  
等閒歸去等閒來

送人之蒼梧

宋林逋

側身南望但依依  
片席乘風去似飛  
莫謂蒼梧在天末  
帝鄉看逐白雲歸

過嚴關有感

李師中

大抵孤忠報國難  
古今共是一長歎  
玉關還路春無綠

定遠歸來鬢已班

四年嶺外得生還  
自顧無功但愧顏  
欲識君恩至深處  
嚴關便是玉門關

留題龍隱巖

軒冕儻來仍假借  
功名難立更因循  
非才不繫蒼生望  
收取林泉自在身

贈韓迥

未衰前已得懸車  
骨立清風八十餘  
松竹最宜貧宅舍

江山偏照白髭鬚

棲霞洞

孫抗

寬踰城闕峻瑤魁萬壑吟風四壁苔不獨雲霞可招隱  
溪流長送落花來

寒山

余靖

空翠紛紛冷不流風雲長是護靈湫山神鞭起龍行雨  
散作炎州六月秋

謝邕倅王寺丞惠韓柳碑文

南方異產足珠珍  
薏苡興讒不忍聞  
一見知君清白節  
篋中惟貯色絲文

思柳亭

陶弼

羅池刺史寡塵緣  
畫戟牆頭築望仙  
黃鶴與誰同一去  
碧桃無主又千年

桂林

青羅江水碧連山  
城在山光水色間  
莫道宜人惟桂郡  
驂鸞客至只思還

題順應廟

白崖山下古松青  
暫捲牙旗謁廟靈  
見說崑崙關北畔  
曾將草木作人形

荔浦莫鰲關

三任邊州六往還  
此時纔入莫鰲關  
訪僧莫道無閒事  
手指青山口問山

邕州

南極諸蠻傲典刑  
斗門時復見飛星  
君王仁恕將軍老

五卞溪州六萬丁

邕州城

夜半孤城百尺臺  
亂蟲聲裏一尊開  
憂邊日繞南雲下  
戀闕心隨北斗回

鬱林鼓角樓

去歲同登畫角城  
諸蠻未滅夜談兵  
五更將吏知人意  
吹作梅花塞外聲

寄鬱林郡守姚道

闕

越裳濟海喜天田五葉戈船不渡兵堯舜遠方皆樂國  
漢唐諸將本書生

柑子堂

子厚才名甲有唐謫官分得荔支香羅池水盡黃柑死  
獨有空碑在畫堂

靈巖

溪僧過此說山公遊遍真仙洞府中乳石崖邊得靈草  
可能封裏寄衰翁



仙影山

月帶星冠映碧虛  
遠看雖有近還無  
瑤池玉女雙雙過  
遺下羣仙聚飲圖

安城即事二首

往歲傳聞南詔檄  
近時方築伏波城  
安城太守知邊計  
菡萏花中閱水兵

金鼓聲闌劍戟收  
使君回上雅歌樓  
樽前一闋清商曲  
銷盡窮邊萬里愁

送沈生昆弟隨侍之博白四絕句 張方平

災方景象異中原海氣昏昏雜瘴烟今日遐荒成雅俗  
薰風南播自嬌絃

不須南浦懷消黯好過西山訪隱淪比到嶺時應近臘  
相思可寄一枝春

東連海道徹扶桑北望神臯斗柄旁兩處音塵杳難接  
征鴻歲只到衡陽

夕陽疎葦暮江湄秋色蕭蕭動客思自恃嚴君領州去

豈同騷客夢邊時

暢巖懷古

姚嗣宗

寒谷長留九秋氣  
暢巖別是一壺天  
清風不動名猶在  
還繼宣尼出聖賢

吳容州仲一挽詞

蔡襄

竹屋繩橋自有村  
半山簫笛不堪聞  
碑前更問何年月  
為借容州舊使君

過桂州

黃庭堅

桂嶺環城如雁宕平地蒼山忽嵯峨李成不生郭熙死  
柰此百嶂千峯何

過全州訪朱德父

萬里瀟湘一故人白頭親老尚懸鶉環家但有千竿竹  
望月空耕一畝芹

鐔江即事

閉門覓句陳無已對客揮毫秦少游正是不知溫飽味  
西風吹淚古藤州

滑石泉

鄒浩

馬頭今日度嚴關十九年前去復還惟有流泉聲似舊  
憑闌重聽響潺潺

桂州紫極觀主求亭名名曰轉斗而示此句

轉降適斗藏初九上清密語誰知有七星峯頂紫霞前  
占得輝光常不朽

過雉山

客睡當年記雉山杜鵑聲切枕難安今朝歸向山頭過

不見杜鵑空夢殘

芑葛曾向定中觀  
謂我南遷便可還  
過了三年方語驗  
聊將一笑謝禪關

畫山

幾年密與畫山鄰  
今日歸航駐水濱  
天亦有心酬我願  
歛雲收霧日光新

三峯濶展映天長  
大巧由來未易量  
我欲移歸殿前去  
萬年千載對君王

掃成屏障幾千春  
洗雨吹風轉更明  
應是天工醉時筆  
重重粉墨尚縱橫

陽朔路

雲裏峰巒千萬重  
中間一路與天通  
新陽已約為前導  
回我車輪朝帝宮

斗米灘

灘在桂州南六十里俗傳古有僧自遠來者近挂人也舟所灘不可上餘糧一斗食

之既盡乃登山望故鄉化而為石至今絕頂有石如僧立之狀

粥飯都來一斗糧  
灘前喫了倍蒼黃  
把如立作山頭石

何似急行歸故鄉

捍門山

揚子江頭舟楫回  
海門山對潤州開  
故鄉歸去六千里  
先入捍門山裏來

移居昭州

廣南東西四十州  
瘴癘莫與新昭侔  
我身多病亦多危  
陛下仁同天地流

日日聞人說桂州  
桂州朝夕遂經由  
自憐罪大當踰嶺



深荷皇恩不遠投

忠孝從來不兩全  
兩無忠孝倍堪憐  
自新有路君恩重  
猶冀他時不愧天

平樂來仙閣

仙宮嶺下來仙閣  
太守更名為我來  
來來既有時歸有日  
飄然從此御風回

清華閣

泉石清華世莫知  
蕭然無是亦無非  
二年於此陪鷗鷺

收得閒中勲業歸

道傍婦

長插雙釵低繫裙手持青繖步如雲忽然退傍芭蕉立

元是前頭逢伯君

昭婦謂伯公叔公為伯君叔君

題義明定慧庵

結草依山名定慧於此冥心第一義鑪香深炷席簾垂  
老僧不見庵外事

修仁茶

味如橄欖久方回初苦終甘要得知不但炎荒能已疾  
攜歸北地亦相宜

嶺南州縣接湖南處處烹煎極口談北苑春芽雖絕品  
不能消鬲禦烟嵐

龍鳳新團出帝家南人不顧自煎茶夜光明月真投暗  
悵望長安天一涯

廣南四時攝養括子

元祐中知鬱林州左朝散郎  
何與猶所撰印以施人人遵

用之無  
不安泰

仁者存心固不同四時括子廣西東蒙恩歸去雖無用  
留作韋弦戒我躬

栩栩軒

鄰居王子正秀才求軒名為取莊  
子所謂栩栩者名之示以絕句

不知覺夢不知憂物與心冥事事休此是道人真境界  
西家分得亦同遊

送擇老赴桂州龍華會

罪大投身瘴癘鄉親年老矣重難忘龍華會上諸賢聖  
為熱精誠一炷香

紀夢

十二夜夢孫夢臣報予已有賜還之命後三日夢臣  
有簡來云昨夜夢予遣人諭以得移信州豈偶然哉  
夢如符節自然合吉事有開期必先天地無私人主聖  
孤臣從此望歸田

風前火烈逢真玉雪後大寒見老松  
攜得此心歸北去與君無處不相逢

幽居不許穿雲到寶閣仍忘破曉登  
多少從來疑著處

一齊分付打包僧

留別龍城山主懷義

陽朔千山復萬山最深山處是松關  
新詩吟罷無餘事一片真心雲共閒

仙閣龍城一望間每來過我不知還  
汀鷗猶集欄干外應怪從今氣象閒

好事如師豈易逢不辭趺足訪行蹤  
揮殘麈尾知難再目斷碧蓮峯外峯

青天無礙本來同  
休向江邊動別容  
師似碧潭吾似月  
東西南北總相逢

三車黃葉止兒啼  
一句何人妙得知  
今日為師重說破  
滿軒風靜月明時

留別興安唐叟元老推官

天繪亭邊三載夢  
石灰鋪裏一時情  
箇中不是同參得  
胸次崢嶸何日平

次韻和仁仲滑石鋪泉軒

長官心事古人前碧玉峯巒碧玉泉洗出北歸烟瘴眼  
光明欣覩太平年

假寐靈川報恩寺

故人猶在驛亭邊暫向雲房借榻眠漏泄祖師多少意  
松聲都到小窓前

戲靈川令王洵仁仲

長官貪著祖師禪有甚心情問我船一隻逃歸兩隻破  
謾憑江檻望靈川



道陽朔山水尤奇絕舊傳為天下第一非虛語也

賦二絕

李綱

溪山此地藹佳名雨洗烟嵐分外青却恨征鞍太匆遽  
無因一上萬雲亭

賦詩曾送謫仙人垂老翻遊到海濱夢幻去來何日了  
空將白眼看嶙峋

山月驛聞子規次韻

春枕夢回孤館悄世故縈心愁不了山深夜聞子規啼

殘月滿窓天未曉

過北流縣八里遊勾漏觀

百里仙山氣象雄參差峰岫翠成叢雲駢鶴馭今何處  
丹竈依然洞穴中

葛翁求令為丹砂今我來從海上槎祗恐山靈嫌俗駕  
未容歸客卧烟霞

羽人相導把霓旌窈窕松林露氣清不用逢迎同貴客  
暫來花院聽棋聲

甌山

郭祥正

賀州城西丹甌山一亭遙插紫雲間  
龍墀讓策名猶在  
鶴馭臨風去不還

玄風洞

張孝祥

山入烏蠻連越雋天開斗野對珠宮  
應憐桂海長炎熱  
乞與清涼萬竅風

古秦城

塹山湮谷北防胡南築堅城更遠圖  
桂海冰天塵不動

那知隴上有耕夫

登七星巖

魁杓歷歷控雲嵐地濶天虛萬象涵  
不與天公管喉舌猶堪嶽立鎮湘南

欣欣亭

王翬

清湘北郭崇岡路松竹年來定幾圍  
我亦臨淮築新宅與君萬里對柴扉

遊劉道人巖

曹輔

故老能將舊事傳  
仙翁蹤跡尚依然  
方知物外壺中景  
隱隱烟霞有洞天

古秦城

海窮山盡尚南征  
髀肉消殘只自驚  
回首長安八千里  
此中那得有秦城

同歐陽晦夫邂逅游風洞

一水羣峯翠若堆  
洞天終日鼓風雷  
每懷絕境超然處  
卻與幽人偶爾來

江夏別魯直送之宜州

潘大臨

翰墨精神全魏漢文章波瀾似春秋可是中州著不得  
江南已遠更宜州

試雙井茶追憶山谷先生

徐得之

先生老作宜州鬼誰與一甌同注湯至今捧著雙井碗  
猶帶是翁書傳香

賀州作

政和間毛衷知賀州有惠政  
任滿將歸值方臘亂遂家焉

毛衷

幾年宦跡浪江湖到此功名心已無  
獨上高樓翹首望  
江郎山下白雲孤

留題雉山

尚用之

座下聞經本至誠改頭易面悟前身  
信知大道無難事  
一念真如雉化人

題雉山院

蔡瑗

白雉聞經向此山轉身來伴老僧閒  
大都見善能開悟  
天上人間任往還

伏波巖

宗道傳

銅柱威聲凜百蠻肯貪梱載溷溪山無人為起文淵問  
端的珠還薏苡回

和陶弼思柳亭韻

韋旻

白雲變轍結姻緣半夜鎔鋤舞醉仙五百年來得書記  
羅洪溪畔浴沂年

雉山

章峴

晴溪幾曲轉澄灣朝憩龍巖晚雉山林叟野人休笑我



平生所得是官閒

劉仙巖和曹子方韻

梁子美

神仙靈異古今傳窮理修真本自然遺址宛存疑谷口  
蒼崖喬木聳青天

元信自潯洲遣朋尊以明徹冰壺名酒作二十八

言謝之

鄭剛中

是翁明徹一塵無養就江心秋月孤自就相從杯酒裏  
豈惟今日見冰壺

全州尹氏觀

折彥質

當門懸泉一線白繞屋稻田千畝青  
未論茯苓能解垢且教月色滿空庭

全州尹氏觀

鄒楚夫

不嫁當年似薄情一朝跨鶴上青冥  
人間有女能如此羞殺天邊織女星

避地潯州

曾幾

鷄犬圖書同一舸老夫蕩漿兒扶柁  
潯江一繫欲生根

夢下湖南向江左

龍隱巖

朱晞顏

聖主龍飛已在天洞中猶有老龍眠  
便須盡吸西江水  
霈作商霖大有年

韶音洞

曾按薰弦天一方掃除民愠變清涼  
遺音凜凜猶聞耳  
不獨當年味可忘

滑石泉

胡舜陟

奔走塵沙五十程  
泉聲今夜響泠泠  
明朝畫鼓催征騎  
不使行人仔細聽

題靜江府枕流亭

平生壯志在燕然  
投老南征未息肩  
鼯鼠發機端可笑  
暫休戎馬弄潺湲

登七星山

張維

列岫凌虛滌翠嵐  
瀟灑澄徹七星涵  
崑瞻好向西湖著  
飛去何妨自嶺南

自烏石渡相思去歲與朱元晦林擇之偕行講論  
之樂賦此

張 栻

朝來一舸渡湘水山色橫秋真可憐忽憶去年聯騎客  
沙邊搔首意茫然

韓廷玉築亭於官舍之旁園中故多梅會有飛雪  
予因題其扁曰梅雪蓋取少陵詩語而劉公貢  
父送劉長官掌廣西機宜嘗用此事有雪片梅  
花五嶺春之句今廷玉適為此官予以名亭抑

其宜也亭邊花木多吾弟定叟舊植故于首章及之  
城陰一徑自深窈花木成行菊遶籬細說當時經始事  
夢回春草費相思

南州要是梅開早北客巡簷偏眼明一夜飛花來點綴  
新亭而復得佳名

眼底風光正自佳滯留何必歎天涯日長況是文書省  
且與閒吟對落花

立春日楔亭偶成

律回歲晚冰霜少  
春到人間草木知  
便覺眼前生意滿  
東風吹水綠差差

題雉山禊亭

一曲清江正可憐  
隔江新竹露娟娟  
好風成我曲肱夢  
起看飛雲度碧天

月巖

吳儆

題詩山寺不勝多人力  
爭如造物何安得  
短篷巖下瀨  
長看清影照寒波

次桂州二首

孫覲

過嶺逢人問象州瘴烟如海蹴天浮  
三閭逐客何時到  
八桂宜人且少休

江上烟雲翠作堆倚天青壁鴈飛回  
神州一望三千里  
不是南遷肯獨來

清湘驛送王柳州南歸二絕

范成大

南歸北去路茫茫不是行人也斷腸  
可惜湘江春夜月  
落花時節照離觴



我已兼程無脚力君猶追路有襟期從今月下共花下  
誰復醉吟先和詩

喜雪示桂人

臘雪同雲嶺外稀南人北客盡冬衣從今老杜詩猶信  
梅片飛時雪也飛

深溪鋪中二絕追路寄呈元將仲顯二使君

賀州歸去柳州還分路千山與萬山把酒故人都別盡  
今朝真箇出陽關

祇有南風捲路塵，斷無南客送車輪。  
故人合在瀟湘見，却向瀟湘別故人。

次韻趙養民碧虛坐上

已將山色染眉黛，更挽江波添酒壘。  
珍重江山勸人醉，笑人騎馬惺惺迴。

碧虛席上得趙養民運使寄詩，約今晚可歸，次韻  
迂之。

偶携尊酒上孱顏，忽憶行人瘴霧間。  
便好來分蒼石坐，

已教不鎖翠雲闌

大通界首驛

愚悃無華敢自欺  
寸誠珍重吏民知  
東風重倚庭前樹  
送別人情似到時

懷桂林所思亭

蓼山奇絕送歸時  
曾榜新亭號所思  
桂水祇今湘水外  
他年空有四愁詩

羅山

嶺北初程分外貪驚心猶自怯晴嵐如何花木湘江上  
也有黃芽似嶺南

甘棠驛

萬里三年醉嶺梅東風刮地白頭迴心勞政拙無遺愛  
慚向甘棠驛裏來

靈泉

驛後有  
龍惠泉

泉螭無語笑經過欲拊筇鰥奈拙何孤奉明恩雖出嶺  
歡顏終少汗顏多

嚴關

或謂之災關柱人守險處朔雪多不入關  
關內外風氣迴殊人以為南北之限也

回看瘴嶺已無憂尚有嚴關限北州  
裹飯長歌關外去  
車如飛電馬如流

與鄭少融趙養民二使者訪古訾家洲歸憩松關  
二君欲助力興廢戲書此付長老善良民當疏  
頭

飄飄竹雨潤輕裘  
娟娟松風繫小舟  
安得從容興廢手  
越人重上訾家洲

送許耀卿監丞同年赴靜江倅四絕

南國春深鴈欲回  
湘江花浪一帆開  
知君不為驂鸞去  
直為淵明五斗來

羅帶江流碧玉峯  
舊遊如夢一星終  
煩披蘚石尋題字  
定有人能記此翁

鴈塔交新比斷金  
故人歲晚更情深  
只今不隔同年面  
想見青雲異日心

官塗真有上竿魚  
玉筍飜乘別駕車  
聞道留行有公論

從今日日看除書

送洪季揚分教橫州兼呈丁帥 劉宰

仕有為貧難擇地志將及物要乘時青山入手南中去  
此意惟應我輩知

五百人中占上游四千里外客諸侯南中賴有賢方伯  
處我應須勝自謀

融州西樓望山 陳藻

西樓門外數峯青合看芙蓉展看屏回首東郊晴日出

千人躍馬上天庭

融州除夜寄福清劉九兄

臘月牂牁三十日相思覓句上譙樓  
遙知今夜柴爐會說我無家更遠遊

融州望鄉

故國來來八十程登樓迷却桂州城  
望鄉不分千山隔上趣金烏日裏行

冬日融州絕句



四隻漁船叩板門幾家茅屋長兒孫天寒水淺江成路  
地僻人稀郭賽村

余融州生日

牂牁相遇說長年一在公堂一洞天清遠史君黃石老  
西周柱史混元仙

過桂平

嶺南大半尚鴻荒城壁空堅草莽長忽到潯州江上飲  
喜他風物近吾鄉

過象州

都無一物作生涯  
坊巷蕭條有幾家  
料得寒梅應悵恨  
滿城開作寂寥花

別融州

兩年為客憶鄉樽  
酒何時別此間  
今日移舟出城市  
多情却戀眼中山

謁羅池廟

友人余子畏嘗以詩戲余  
尾聯云我合焚香夜深坐

等君頭白柳州來後余有東寧之役過柳州界謂前  
詩應於此矣及泛江東還謁羅池廟乃知行止前定  
平生不作羅池夢今日還來謁柳祠忽憶故人曾得句  
鬼神先我七年知

炎關

劉克莊

關北關南氣候分雪飛不過古來云若非曾發看山願  
老大何因入瘴雲

秦城

缺甃殘碑無處尋當年出此慮尤深君王自向沙丘死  
何必區區戍桂林

乳洞

千峯夢裏向崔嵬不記青鞋走幾迴天恐錦囊猶欠闕  
又添乳洞入詩來

見方雲臺題壁詩次韻

寄書迢遞夢參差每見留題慰所思不論駟亭僧寺裏  
有山水處有君詩

題霞溪驛

一溪春水弄晴沙，蕩漾輕風舞落花。  
此去洞源知有路，夕陽西下半天霞。

榕溪閣

山谷南遷  
維舟榕下

榕聲竹影一溪風，遷客曾來繫短篷。  
我與竹君俱晚出，兩榕猶及識涪翁。

榕臺二絕

拔地高崖如鐵色，拂天老樹作寒聲。  
他年記宿榕臺夜，

便是南歸第一程

囊無金累貧如故鏡裏絲生老奈何一事尚堪誇北客  
來時詩少去時多

玄山觀

來瞻石像看唐碑一徑蒼松映碧漪聞說宋公曾住此  
寄聲過客細吟詩

楔亭

年年春草上亭基父老猶能說左司寂寞當時修楔處

一間老屋兩殘碑

劉仙巖

絕頂來尋鍊藥踪  
老仙端的是吾宗  
寄聲月白風清夜  
定許相期第幾峯

再遊棲霞洞

直路幽陰側路明  
玉為墻壁雪為城  
慙慙報有詩翁到  
萬一仙人肯出迎

桂州春日五絕句

眼邊桃李過匆匆鏡裏衰顏豈再紅久覺胃寒疎建焙  
新因血熱戒邯鄲

步入西風不見人數聲澗鳥自啼春下山欲與唐碑語  
先遣奴兵細拂塵

歸到城門欲發更馬頭惟有暮鴉迎小窓了却觀書課  
幾首殘詩旋補成

老懶何心更出嬉閉門終日讀陶詩湘南二月花如掃  
却是扶疎繞屋時



曉風細細雨斜斜  
僊僊書生屋角花  
想見水南僧寺裏  
一株落盡病山茶

湘中口占三首

少年裘馬事輕狂  
晚看梅花到瘴鄉  
一色海風吹面黑  
免教人謗作何郎

船頭吹火盧仝婢  
馬後肩書潁士奴  
安得世間名畫手  
寫余出嶺泛湘圖

津吏沙頭立指呼  
放舟出鎮要州符  
書生行李堪搜檢

薏苡明珠一例無

嘉蓮洞

呂愿中

幕幕烟雲鎖洞關  
旁開六戶類連環  
芙蓉未是仙家瑞  
更約同登太華山

朝陽洞

半世觀山鬢已皤  
欲求釣艇老漁簑  
杖藜又過烟霞洞  
聞說當年爛斧柯

白雀洞

洞中石燕何長生白雀何因浪得名無限好山難買得  
世間奚用孔方兄

夕陽洞

怪底浮屠不宿桑直搜巖竇意徜徉洞中日月未嘗老  
何事仙家有夕陽

南華洞

乳崖深峭水淙幽六夏來遊儼似秋安得遽遽一覺夢  
倚巖栩栩訪莊周

假守睢陽呂愿中叔恭機宜祥符劉襄子思通守  
鄆陽朱良弼國輔經屬建安陳廷傑朝彥因祈  
晴乘興遊中隱嵩留題以記勝遊

坎止流行但信緣嶠南風景異山川偶因乘興穿山腹  
始悟壺中別有天

劉仙巖

平湖小隊出郊墟盡日登臨據隼旟聞道仙人尸假去  
尚應猶學世間書

題元巖

萃律倚空蹲怪石輪囷夾道卧長松白龍應已冲天去  
巖竇巋然有故蹤

敬和經畧直閣侍丞丈贈劉升之蟄嵒之作二首

唐弼

古人事業不關書聖處工夫詠舞雩窈窕嵒居辱題品  
南陽端有卧龍無

倚天寒碧鎖嵌空咫尺丹霄有路通莫向明時縮頭角

風雨只在笑談中

遊龍隱崑二首

張叔信

幾年鱗甲蟄清淵一旦飛騰石自穿  
遺迹漫存離舊隱定應銜雨去朝天

洞口崑高著數椽  
湫靈聽法護金仙  
騰身一躍天池後  
雲霧于今尚滃然

九龍山

張自明

輕陰漠漠曉春天  
草路鋪茵柳似氈  
閒訪龍君話行色

雲平深洞水平川

慶遠白龍洞

白龍洞口白龍臺一俯南天眼豁開蒼壁漫題三數字  
後人還笑我曾來

筆山

陶崇

晚來設色霞成綺秋至迴文鴈作行借問墨池何處是  
一江環遶漱琳琅

欣欣亭

在全州

李大異

門外青山收暮雨  
林間歸路出行人  
鷓鴣勸我早歸去  
擬斫釣筒收紫筠

雨露汪洋四海春  
嶺南嶺北多歸人  
朝中賢士罕過此  
莫惜青錢呼白鱗

贈劉升之蟄龍崑

胡槻

東望堯山西舜宮  
山人名姓不求通  
蟄崑側畔蘧廬子  
即是巢由住箇中

龍隱巖

陳峴



烟蘿深鎖非凡境  
泉石相逢似故人  
歸認落花猶恐誤  
天風為我隔囂塵

依綠亭

修林平沼久荒埃  
招領春風一笑回  
淨掃莓苔分徑岸  
賸添桃李結亭臺

全州礮巖

泉流縈帶戛冰玉  
石壁深窈寒侵衣  
開鑿應勞造化力  
窟宅如待靈仙歸

白石山

張志道

山似遊龍勢欲奔  
山中有路透天關  
峯巒常帶烟霞色  
洞穴渾無斧鑿痕

鬱林郡城

廖德明

荒烟漠漠雙江上  
往事悠悠古戍孤  
春到偏臨青草渡  
夢中猶記白鷗湖

鵝翎山

一曰娥英

甘叔異

俗謂鵝翎未必然  
娥英恐是古時傳  
溪聲流盡蒼梧淚

斑竹林中聞杜鵑

潯州行部

曹亨伯

冬來行部駕輶車一日之間氣候殊朝服駝裘暮揮扇  
未知嵐嶂得全無

綺川亭

楊志

一泓綠淨滄浪水千朵紅稠菡萏花病眼紛紛何所思  
江天落日散餘霞

興安乳洞

陸詵

深沉三洞啟真都萬乳千葩狀絕殊  
馳驛方朝金闕去  
滌塵來飲碧琳腴

橫州古鉢山

徐安國

羣嶺中推古鉢尊山川羅列掌中存  
亭臺突兀聖婆廟  
丘垤逶迤山子村

橫州寶華山

秀出城南號寶華翠微深處衲僧家  
百年臺殿歸煨燼  
一逕蒼苔點落花

橫州龍池

為谷為陵事已非  
靈源滙澤發光輝  
有時風雨連村暗  
夜半龍游古鉢歸

橫浦

暑風披拂瘴烟收  
獨倚危樓豁遠眸  
萬疊山圍城堞古  
一灣江抱海槎浮

全州出郊即事

朱子恭

水滿牛耕犢後隨  
早田大半已翻犁  
趁時浸穀清明近

次第秧針綠又齊

經行阡陌日遲遲  
桑柘纔方吐綠枝  
只為峭寒交節晚  
村家却是拂蠶時

招義驛

霜林紅葉襯桐花  
路轉崖根百尺斜  
霽日斷雲成徙倚  
湘南秋盡未還家

湘山寺

陳崇古

三月行途泥濺裳  
倦投山寺憩僧房  
道人休設伊蒲供

只乞清心一瓣香

龍隱巖

張金

何年此地蟄飛龍石壁蜿蜒尚有蹤為報龍公莫貪睡  
郡人于爾卜豐凶

題蔣詩翁故居

鄭會龍

詩翁仙去舊壇荒雲滿空山花自香老盡遊人春不問  
杜鵑聲裏幾斜陽

鳳巢山

王子宣

古邑荒涼瞰小溪  
青山高與白雲齊  
鳳凰飛去巢阿閣  
未肯重來覓故棲

鳳凰飛去聽簫韶  
燕雀羣飛想見嘲  
記取舊時棲止處  
莫教鷹隼誤來巢

雉山

黃照

為愛空門息世機  
儒衣不著著僧衣  
淵魚林鳥已聞法  
更待當年瑞雉歸

過全州

陶金



南北東西幾萬峯  
郡城如畫在圖中  
何人裁斷湘妃竹  
半蘸秋江作釣筒

自合浦還清湘寄虛中弟

陳瓘

三年已絕生還望  
一日天恩到海涯  
路過清湘猶間濶  
當時何不住長沙

行徹天涯萬里山  
月明方照海珠還  
瘴鄉來往渾閒事  
聊為清湘一破顏

曾近滄溟看颶風  
波濤有盡海無窮  
四年陳迹今何在

坐對湘雲豁晚空

瘴海只將梅作雪  
湘山今見麥為春  
晴空有月當如舊  
嶺北山南總照人

與全州崇寧斷臂和尚

少年得髓幾人知  
想見當年斷臂時  
此是湘山大知識  
衡門堪繼會昌師

橫浦

賈成之

橫槎三月江如束  
風浪縈紆接天綠  
郡樓新創插雲飛

盡日江山對雙目

壽陽山

石仲元

平原翠削萬瓊瑰  
頓轡塵沙眼暫開  
文網牽人寧底急  
未妨特特看山來

湘山寺

陳關名

自笑文書度日忙  
拂纓時亦為徜徉  
禪窓翠擁琅玕淨  
茶罷心清一縷香

夏雲

僧奉恕

如峯如火復如綿飛過微陰落檻前大地生靈乾欲死  
不成霖雨漫遮天

時相章惇謫雷州經游南山題詠此識之

白石山

無名氏

祥雲矗矗玉峯高瑤草香烟醉碧桃聲斷鐵簫歸鶴馭  
長風空壑鎖松濤

題靈鷲山石壁

跨鶴曾來不記年洞中流水碧依然紫簫吹徹無人問  
萬里西風月滿天

堯山

元 呂思誠

堯山絕秀嶺南天  
雪壓林嵐飄素烟  
高倚暮雲屏掩翠

半消晴日玉開田

平樂政平樓

灘江江上古昭州  
一帶孤城有此樓  
雪護山容簷外立  
月將波影檻前流

過鬼門關

別多喇卜丹

雷陽任滿鬱林還  
過了千山及萬山  
但願人心平似水

不須惆悵鬼門關

靈川縣觀桂林山

陳孚

碧波洗出萬雲鬟堆滿殘陽紫翠間  
三世眼根修得到  
天教盡見桂州山

盤石山

懸崖千仞鐵崔嵬勢似飛蚪卷海來  
我見只疑山欲躍  
馬蹄不敢蹴青苔

自永福縣過八十里山

下山如井上如梯亂石嵯岈割馬蹄正是行人行不得  
鷓鴣更在隔林啼

過牂牁江

青草風吹毒霧腥交州何在海溟溟牂牁已恨天涯遠  
又過牂牁十二程

思明州元日

去年元日步瀛州獸舞天墀拜冕旒山驛今朝一樽酒  
微臣身在嶺南州

三雛掌上玉娉婷拂曉嘔啞語到明今日亂山孤枕上  
耳邊忽似有啼聲

思明州五首

風吹蠻雨滴芭蕉杵臼敲殘夜寂寥習得孤燈牀榻畔  
思明州裏過元宵

手捧檳榔染蛤灰峒中婦女趁虛來蓬頭赤腳無鉛粉  
只有風吹錦帶開

鹿酒香濃犬彘肥黃茅園上紙錢飛一聲鼓絕長鎗立



又是蠻巫祭鬼歸

毒蟲含弩滿汀沙  
荒草深眠十丈蛇  
遙望天邊紅似火  
瘴雲飛落木棉花

刺竹叢叢苦筍生  
山禽無數不知名  
元宵已似春深後  
龍眼花開蛤蚧鳴

江州

在谿洞

司馬琵琶昔日歌  
天涯流落事如何  
若行今日江州路  
應是青衫淚更多

老母越南垂白髮病妻燕北寄黃昏瘴烟蠻雨交州客  
三處相思一夢魂

廣西即事二首

傳與礪

南鎮干戈日夜陳西山寇盜出猶頻荒村百里無烟火  
聞道官軍更殺人

比歲供輸不自聊祇今氛祲未全消陳前將士須殊死  
莫倚功多氣轉驕

正月二十四日至寶主驛是北流縣自此遵陸指

鬱林矣

范梈

遠辭金闕碧雲端  
沂盡夸江未到官  
回鴈峯南更千里  
是行誰為報平安

貴縣南山

秦儼

二十四峯圖畫裏  
九千餘里宦遊中  
滿川禾黍無豺虎  
便是南行奉使功

劉仙巖

劉質

峭壁玲瓏倚碧穹  
白雲仙去石崖空  
劉郎今日重來此

一笑青山萬壑風

呂公巖

梁 遺

松涵雲景竹生烟  
松竹深藏小洞天  
讀罷黃庭觀鶴舞  
更於何處覓神仙

遊中隱山

郭思誠

訪隱尋幽緩著鞭  
梅花初試小春天  
孤峯上下分三洞  
一水縈紆溉萬田

育德亭

李 興

峯頭泉飛六月涼東南賓主曲流觴松陰密葉清如許  
詩酒開懷興更長

西湖

江文叔

桂林佳麗冠羣城父老從來不識兵南嶠昔雖多勝概  
西湖今獨擅佳名

藤江

麥澂

桃花浪暖錦鱗肥白髮漁翁罷釣歸柳底繫船篷底坐  
滿前鷗鷺已忘機

鴨灘

中流亂石水交加  
滾滾寒聲帶雪花  
霜月不隨流水去  
只將秋色伴漁家

龍驤山

東山雲歛碧天開  
月色蒼茫海上來  
風露滿空清似洗  
一庭花影轉瑤臺

石壁山

千尺丹崖石削平  
波光倒樹礙雲行  
何當借我烟霞榻

卧聽泉聲看月明

赤水峽

水氣初升雲氣浮  
山林不辨鳥聲幽  
天風吹入三竿日  
草木依然水遶州

谷山

層巒疊翠瘴江湄  
水色林光雲起時  
雲鶴自閒春自老  
箇中風月幾人知



粵西詩載卷二十二